

Date – 10/03/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- Mizoram Legislative Assembly session vawiin khan zu khapna dan siamthatna tur, “The Mizoram Liquor (Prohibition) Amendment Bill, 2025” chu eptu te tel lova pass a ni.
- Lawngtlai West Bialtu MLA, Pu C.Ngunlianchunga'n Assembly Rorel inkhawmah thubuai a neih thu leh bail lailawk la turin hrilh ni mahse lak a tum loh thu a sawi.
- Parliament Budget session thawhnhnihna chu vawiin khan tan a ni
- Union Jal Shakti Minister C R Patil chuan Jal Jeevan Mission hnuaiah thingtlanga chenna in awm zawng zawng zaa 80 chuangin an inah tui an herh haw thei tawh a ti.



MLP ACT AMENDMENT PASSED

Mizoram Legislative Assembly session-ah vawiin khan zu khapna dan siamthatna tur, “The Mizoram Liquor (Prohibition) Amendment Bill, 2025” chu eptu te tel lova pass a ni.

Bill puluttu, Excise and Narcotics Minister Pu Lalnghinglova Hmar chuan he bill hi zu phalrai na tur a ni lo tih sawiin, sum siamna tur lian tham pawh a awm lova, vote zawna tur a ni lo bawk tih House a hrilh a, he bill hi kuthnathawktute lam tang bill a ni tih sawiin, zu khap burna a ngheh lehzualna tur a ni tih a sawi a ni.

He bill chungchang hi sawi a hlawh hle a, member 23 in house chhungah an sawi a, Speaker Pu Lalbiakzama chuan he bill he house chhunga chai hlawh ber pawl a ni tih a sawi a ni.

Eptu hruaitu Pu Lalchhandama Ralte chuan, zu khap bur an duh laia zu zawrhna tur bilh luhna bill chu an pass pui thei lo tih a sawi a, house an chhuahsan a ni.

BJP MLA Dr K Beichhua chuan dan thar zeh luhah Excise and Narcotics in special permission nei ho chung a zu a zuar tur chu an pawm thei lo a tih a sawi a ni.

House Leader Pu Lalduhoma chuan member ten house an chhuahsan chu pawl a tih thu sawiin, bill ungrual taka pass theih an duh a, eptu lamin an duhlo a nih pawhin ‘duhlo’ an ti mai turah a ngai a ti a, he bil hi zu zawrh phalna ah ngaihsak luiin puh lui tlat mahse Zoram mipui ten an pawmpui theih a beisei a ni, a ti.

Excise Minister Pu Lalnghinglova Hmar chuan tuna MLP Act hman mek chuan Autonomous district 3- Mara , Lai leh Chakma Autonomous District Council te a huam lova, tuna an bill putluh hi chuan Mizoram pum a huam tawh dawn tih sawiin, Autonomous district 3-ah te pawh hian sap zu leh rakzu te chu khap vek a ni dawn tih a sawi a, hemi chungchangah member te atanga a duhlo an awm avangin Autonomous District Council a hman ve tumna erawh ennawn theih a ni ang a ti.

<><><>

CM WINE

House Leader, Chief Minister Pu Lalduhoma chuan kum 2018 MNF chuan wine zawrh phalna dan a siam tawh tih sawiin, kum 17 chhung wine siam phaltute party ngei chuan wine chu zu anga sawiin an duh lo thar thut a ti a, wine chu zu a nih chuan MNF chuan zu an lo zuar ngar ngar thin a ti a, tunhma zawnga an sawisel ngai loh thil sual tak ni-a an sawi thar chu hriatthiam har a tih thu a sawi.

Kum 2019 khan MNF chuan MLP act a siam a, hetah hian Mizo zu te pawh siam phal a ni tih sawiin, dan mumal nei lovin kum 4 chhung an kalpui hnuah ZPM chuan an chhunzawm mai niin a sawi a, an bill siam tharah chuan zu chhe in avanga thihna leh dam lohna tam lutuk tiziaawm tumin Mizo zu neih hrang hrang te telh an tum a, hetihlai hian kohhran hruaituten zu tih tel hrim hrim an remtih loh avanngin Mizo zu te chu an paih leh ta tih a sawi a ni.

<><><>

CM : UCC

Chief Minister Pu Lalduhoma'n Mizoram Sorkarin Uniform Civil Code (UCC) hman tumna a nei loh thu House a hrihlh.

He thu hi vawiina Assembly thutkhawmah sawiin Chief Minister chuan UCC chu Mizoram in na takin a dodal thin a ti a, Sawrkar laipuiin barh luih a tum pawhin theihtawpin an tang dawn tih sawiin Article 371G phena him turah an inngai tih sawiin Sawrkar leh Tlawmngai pawl hrang hrang nen tan ho a ngai tih a sawi.

Chief Minister chuan Protected Area Permit chungchang sawiin nikum June leh December inkarah foreigner 2000 dawn anlo lut a ti a, heng lo lut thenkhat hi Chin Hills lamah training an pe nia hriat niin American Ambassador pawh State sawrkar hrihlh lovin a rawn lehleng a, tunlai Geo Politics ah ram lian te en mek lai ani tih sawiin Mizoram chu foreigner kalkawng an nimek a ti a, Tourist pangai ni lo tam lutuk chu India sawrkar ngaih a thatloh avangin Sawrkar laipuiin Protected Area Permit chu hman tan turin thu a pe tih a sawi.

Pu Lalduhoma chuan Free Movement Regime chungchang sawiin zalen taka inkalpawh chuan thil tha lo a keng tel thin a ti a, raltlan lokal te chu an enkawl tur ni mahse an awmna hmun a ralmuan hnuah pawh haw tum tawhlo tam tak an awm a ti a, zalen lutuka inkalpawh chuan sual rawngbawlina tam tak a ken tel avangin Sawrkar laipui hmalakna Free Movement Regime tih tawp pawh a tul rih ah an ngai tih a sawi bawk.

<><><>

NGUNLIANCHUNGA

Lawngtlai West Bialtu MLA, Pu C.Ngunlianchunga'n Assembly Rorel inkhawma Chief Minister Pu Lalduhoma'n thubuai a neih thu leh bail lailawk la turin hrihlh mahse lak a tum loh thu a sawi.

Vawiin tlai khan Congress MLA Pu C.Ngunlianchunga chuan Aizawl Press Club-ah thuhthar thehdarhtute kawmin, Chief Minister in thubuai a neih thu a sawi

chungchangah thiam lohna a neih a hriat loh thu leh a tul a nih chuan ram tana jail tan a inhuam tih a sawi.

He thubuui rawn in tanna hi a sawifiah a, kum 2013-a Lai Autonomous District Council, CEM a nih lai khan Lawngtlai khawpui heltu tur, kawng an laihnaa ram tihchhiatte leh leivungin thlai a tihchhiatte zangnadawmna pe turin a kaihhruai LADC leh ram neitute chuan inremna an siam a, kum 2014 January thlaah Minister a nih tak avangin CEM atangin a bang a, amah thlaktu CEM Pu V. Zirsanga kaihhruai hnuaiah sum tihchingpen thubuui a awm a, kha kawng siam hna kha CEM a nih laia bul tan a nih avangin thubuui hi an siamsak ve niin a lang a ti a ni.

Khatih hunlai khan CEM ni mah se cheng khat mah a khawih lova, tu hnenah mah a pek bawh loh avang leh, kawngpui siam hna chungchang leh a contractor tur pawh Executive secretary leh Planning and Development officer te nen insiamrema hmalak a nih avangin engmah a hriat pui loh thu a sawi a, ACB ten a chenna inah tum 2/1 thu an zawhfiah pawhin engmah a hre ve lo tih a chhan bak chu thubuui a nei tih pawh a inhre lova, House-ah pawh thu a neih loh thu a sawi phah tih sawiin, waviin Assembly Rorel inkhawmah Chief Minister-in thubuui a neih thu a sawi hma kha chuan case a nei tih a in hre lo tih a sawi a ni.

Pu Ngunlianchunga chuan Chief Minister-in House-ah bail lailawh la turin thurawn pe mah se, he case-ah hian anticipatory bail lak a tum lova, ram tana thil tha ti-ah a inngaih avangin a tul a nih chuan ram tana tan mai bakah thih pawh a inhuam tih a sawi a ni.

<><><>

ART& CULTURE MINISTER-SESSION

Art & Culture Department Minister, Pu C.Lalsawivunga'n NGO te tan hnam thuam hrang hrang leh rimawi tumna bungrua te chu a man zat atanga zaa 25 tumin an lei thei tih a sawi.

He thu hi waviina Assembly thutkhawma zawhna leh chhanna hunah sawiin, Minister chuan MUP, YMA, MHIP leh NGO dang te tan Mizo thuam- Puanchei, Kawrchei, Ngotekherh, Hmaram, Pawndum, Thangchhuah than leh Vakiria te bakah bungrua- Darkhuang, Darbu, PA Set leh Acoustic Guitar te chu a diltuten a man zat atanga zaa 25 tumin an lei thei tih a sawi a, Art & Culture-a Fine Arts hnuaiah music a zir theih reng tih a sawi a. Hei bakah hian Falkawn Zokhua chu zozia leh Mizo ei lehin phochhuah theihna bakah kut buatsaih theihna leh khualzin thlen theihna tlaka tihchangtlun tuma hmalak mek a ni a, chumi atan chuan pawisa dil mek a nih thu House a hrilh a ni.

Pu C Lalsawivunga chuan Hnam puan zinga chibil ang chi chu a hranpaa sawi ni lo mahse la ngaihtuah theih a ni turah a ngai a ti a ni.

<><><>

LENGPUI AIRPORT-SESSION

Chief Minister Pu Lalduhoman Lengpui Airport chu Indian Air Force (IAF) kuta hlanna tur Draft Memorandum of Agreement (MoA) chu Working Committee-in a buatsaih mek a, peihfel a la nih loh thu leh Cabinet ngaihtuah tura theihluh a la nih loh thu a sawi.

Waviin session-a zawhna chhangin Chief Minister Pu Lalduhoma chuan Lengpui Airport hlan chhawn chungchang hi Pu TBC Lalvenchhunga kaihhruai Working Committee din a nih thu leh he committee hi IAF hnena Lengpui Airport hlan chungchang zirchiang leh Draft Memorandum of Agreement buatsaih tura sorkar-in a din a nih thu a sawi a, Working Committee hian Lengpui All NGO leh Mizoram All NGO nen sawiho a nih hnua Chief Minister hovin NGO Co-ordination Committee te nen sawiho leh a nih thu a sawi a, anni nen hian 16th

Finance Commission hnenah Airport tihchangtlunna tur nawr ho ni se tih a nih thuin Chief Minister chuan a chhang bawk.

GAD changtu Chief Minister Pu Lalduhoma chuan - Airport atangin chhiah dang lak belh a awm a hriatloh thu zawhbelhna chhangin a sawi a, Aizawl - Kolkata flight tih tlem chhan chu passenger an tlem vang niin Chief Minister chuan a sawi a. Passenger an tam chuan an belh leh mai theih thu an sawi niin Chief Minister chuan a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PARLIAMENT

Parliament Budget session thawhnhnihna chu vawiin khan tan a ni a. Vawiin rorel inkhawmah hianTamil Nadu-a National Education Policy chungchanga Union Education Minister Dharmendra Pradhan-a thusawi avangin eptu lamten lungawilohna lantirin rorel an ti khaihlak a. Chawhnu dar 12 khan rorel inkhawm hi tihtawp zui a ni. Lok Sabha-ah chuan rorel inkhawm tan anih in DMK MP T Sumanthy chuan Question Hour-ah sawrkar laipui chu Tamil Nadu hnena Centrally Sponsored Scheme sum pe duh loah a puh a. Hetihlai hian Union Education Minister Dharmendra Pradhan chuan PM Schools for Rising India (PM SHRI) atana sawrkar laipui MoU ziahpui remtih hnua inhnukdawk leh ah Tamil Nadu chu a puh thung a ni.

<><><>

UNION JAL SHAKTI MINISTER

Union Jal Shakti Minister C R Patil chuan Jal Jeevan Mission hnuaiah thingtlanga chenna in awm zawng zawng zaa 80 chuangin an inah tui an herh haw thei tawh a ti.Vawiina Rajya Sabha-a zawhbelhna chhangin Pu Patila chuan kum 2019 khan thingtlanga chenna in zaa 16 chauhin mahni ina tui an herhhaw thei tih a sawi a ni.

Vawiin vek khan Parliament tualah Union Jal Shakti Minister C R Patil chuan chanchinbumite hmaah Ganga tui chu a thianghlim thu a sawi bawk a ni.

<><><>

UNION ROAD TRANSPORT MINISTER

Union Road Transport and Highways Minister Nitin Gadkari chuan kawngpui tha a awm chuan bungraw siamna man a tlahniam dawn a ni tih sawiin hei hian industry leh a leitute tan hlawkna a pe ang tih a sawi. Vawiina International Conference on Soaps, Detergents and Cosmetic vawi 7-na a hmanpuinaah he thu hi sawiin Pu Gadkari chuan kawngpui tha hi medium, small and micro enterprises lam pawhin an hlawkpui hle a ti bawk a. Industry lama hotu kalkhawmte chu an thilsiamchhuah man tihhniam kawnga tan la tur leh quality tha tak siam turin a chah bawk a ni.

<><><>